

# Þjónustusamningur um kennslu á framhaldsskólastigi


Mennta- og menningarmálaráðuneytið, kt. 460269-2969, í samningi þessum nefnt ráðuneytið og Tækniskólinn ehf., kt. 531202-3410, í samningi þessum nefndur ýmist verksali eða skóli, gera með sér svofelldan þjónustusamning um kennslu á framhaldsskólastigi, á grundvelli heimildar í 3. mgr. 44. gr. laga um framhaldsskóla nr. 92/2008.

## 1. Lagaheimildir og forsendur samningsins

- 1.1. Um samninginn gilda ákvæði 30. gr. laga nr. 88/1997 um fjárreiður ríkisins og reglugerðar nr. 343/2006 um samninga um rekstrarverkefni sem ráðuneyti og ríkisstofnanir gera til lengri tíma en eins árs, nema ríkari kröfur séu gerðar í lögum um framhaldsskóla nr. 92/2008.
- 1.2. Verksali rekur framhaldsskóla sem skal starfa í samræmi við lög um framhaldsskóla, að undanskildum II. kafla laganna, reglugerðir og önnur stjórnvaldsfyrirmæli sem ráðuneytið gefur út á grundvelli þeirra.
- 1.3. Skólinn hafi viðurkenningu skv. 12. gr. framhaldsskólalaga.
- 1.4. Skólinn starfi á framhaldsskólastigi samkvæmt samþykktum einkahlutafélags sem ráðuneytið hefur fallist á sem eina af forsendum samnings þessa.
- 1.5. Skólinn starfi í samræmi við lög og reglugerðir sem eiga við um starfsemi hans. Þar á meðal geta verið lög og reglugerðir um rekstur aðila sem ekki eru ríkisaðilar en veita opinbera þjónustu sem er kostuð að verulegu eða öllu leyti af framlögum ríkisins, eftir því er við á. Eftirfarandi lög og reglugerðir kunna því að eiga við:
  - Lög um fjárreiður ríkisins nr. 88/1997, einkum 20. og 30. gr. laganna.
  - Reglugerð um framkvæmd fjárlaga nr. 1061/2004.
  - Lög um opinber innkaup nr. 84/2007, sbr. 2. mgr. 3. gr. laganna.
  - Upplýsingalög nr. 50/1996, sbr. 2. mgr. 1. gr. laganna.
  - Stjórnsýslulög nr. 37/1993, sbr. 1. gr. laganna.
  - Lög um Ríkisendurskoðun nr. 86/1997, sbr. 1. gr. laganna.
  - Samkeppnislög nr. 8/1993, einkum 14. gr.
  - Lög um persónuvernd og meðferð persónuupplýsinga nr. 77/2000.
  - Lög um Þjóðskjalasafn Íslands nr. 66/1985, sbr. 5. gr.
  - Lög um skipan opinberra framkvæmda nr. 84/2001.
- 1.6. Aðilar þessa samnings gera einnig með sér samning skv. 2. mgr. 44. gr. framhaldsskólalaga, skólasamning, þar sem fram koma helstu áherslur og markmið í starfi skólans, skólanámskrá, námsframboð, kennslufyrirkomulag, mat og eftirlit með gæðum og annað sem talið er æskilegt til að útfæra samning þennan. Skólasamningur er gerður til fimm ára í senn en áherslur og markmið endurskoðuð og þróuð árlega.

## 2. Þjónustan

- 2.1. Skólinn veitir nemendum og kennurum nauðsynlega þjónustu og aðbúnað sem er nauðsynleg og almennt tíðkast vegna náms á framhaldsskólastigi.
- 2.2. Skólinn hefur sérstakar skyldur til að halda uppi kennslu á fámennum námsbrautum. Ráðuneytið ákveður breytingar á því námsframboði í samráði við skólann. Skólinn skal gera grein fyrir kostnaðarliðum og þjónustu við fámennar námsbrautir í ársskýrslu. Nánar er kveðið á um áherslur í námsframboði í skólasamningi.





- 2.3. Skólinn er kjarnaskóli í skipstjórn og vélstjórn. Á samningstíma hefur hann forgöngu um að þróa námsefni, námsskipan og kennsluaðferðir og aðstoðar aðra skóla og fyrirtæki við umbætur í kennslu og þjálfun á viðkomandi sviði. Skólinn skal gera grein fyrir kostnaðarliðum og þjónustu við kjarnagreinar í ársskýrslu. Fjallað er um kjarnaskólahlutverkið í skólasamningi.
- 2.4. Miðað er við að stærð skólans sé á bilinu 1806 til 1850 nemendur og er þá miðað við ígildi nemenda (ársnemendur) í fullu námi.
- 2.5. Miðað er við að hlutfall nýrra nemenda og nemenda úr skilgreindum forgangshópum sé að lágmarki 10% af heildarfjölda nemenda hverju sinni, eftir því sem nánar er ákveðið í skólasamningi.

### 3. Réttindi og skyldur nemenda

- 3.1. Réttindi og skyldur nemenda skulu vera sambærileg ákvæðum í almennum hluta aðalnámskrár framhaldsskóla og skulu útfærð og birt í skólanámskrá.
- 3.2. Skólinn kynni nemendum og hafi á vefsíðu sinni greinargóðar upplýsingar um réttindi og skyldur nemenda, þar á meðal leiðbeiningar um málskotsrétt þeirra, gjaldtökureglur, fyrirkomulag náms, skólanámskrá og próftökureglur.
- 3.3. Innritun nemenda er á ábyrgð skólans sbr. 32. gr. framhaldsskólalaga.
- 3.4. Forgangur til náms er samkvæmt lögum, reglugerðum og stjórnvaldsfyrirmælum. Miðað er við að skilgreina áherslur, forsendur við innritun og forgangshópa nánar í skólasamningi.
- 3.5. Skólinn taki þátt í sameiginlegri innritun nemenda með sama hætti og aðrir framhaldsskólar samkvæmt nánari ákvörðun ráðuneytisins og fylgir reglum þess um innritun.
- 3.6. Skólinn heldur rafrænt nemendabókhald sem getur látið miðlægu kerfi opinberra framhaldsskóla í té nöfn og kennitölur nemenda skólans, skráningu þeirra í áfanga, einkunnir þeirra og skólasókn, á hverri önn, samanber reglugerð um upplýsingaskyldu framhaldsskóla um skólalag, aðra kerfisbundna skráningu og meðferð persónuupplýsinga um nemendur nr. 235/2012.
- 3.7. Innheimti skólinn gjald af nemendum vegna þeirrar þjónustu sem samningur þessi fjallar um skal ástæða gjaldtöku útskýrð og birt ásamt gjaldskrá á áberandi stað á vef hans. Hækki skólinn gjöld umfram verðlagshækkun eða leggi á ný gjöld kynni hann það fyrir nemendum með góðum fyrirvara og útskýrir ástæður hækkunar.

### 4. Ábyrgð skólans

- 4.1. Skólinn ber ábyrgð á að þjónusta við nemendur sé fagleg og fullnægi kröfum um gæði og sé í samræmi við lög. Hann skal geta lagt fram gögn og skýrslur um innra mat, skv. 40. og 41. gr. framhaldsskólalaga, því til staðfestingar.
- 4.2. Skólinn ber ábyrgð á úrlausn mála gagnvart nemendum, starfsmönnum sínum, birgjum og ráðuneytinu.
- 4.3. Skólinn á rétt á að kaupa þjónustu af verktökum vegna afmarkaðra þátta í rekstri skólans, en slík kaup leysa hann þó ekki undan ábyrgð á framkvæmd samningsins. Skal ekki gera minni kröfur til verktaka en gerðar eru til skólans í samningi þessum.
- 4.4. Skólanum ber að gæta þess að útgjöld séu í samræmi við tekjur og gæta ráðdeildar í rekstri. Tekjum sem verða til í tengslum við samninginn er einungis heimilt að verja til þeirrar þjónustu sem hann nær til.
  - 4.4.1. Skólanum er óheimilt að:
    - 4.4.1.1. efna til óvenjulegra ráðstafana í fjármálum eða skuldbindinga sem verulegar líkur eru á að stofni framkvæmd samningsins í hættu eða bitni á námi og nemendum sem samningurinn tekur til.



- 4.4.1.2. veita önnur lán en þau sem tengjast rekstri skólans. Lán skulu ekki vera með lakari kjörum en almennt gilda í sambærilegum viðskiptum.
  - 4.4.1.3. afhenda, án skriflegs samþykkis ráðuneytisins, réttindi sín og skyldur samkvæmt samningi þessum í hendur þriðja aðila.
  - 4.4.1.4. framselja greiðslur skv. samningi þessum til þriðja aðila og setja með öðrum hætti til tryggingar fjárskuldbindingu skv. 45. gr. laga nr. 75/1997 um samningsveð. Þetta á ekki við um hefðbundin viðskipti skólans við viðskiptabanka sinn.
  - 4.4.1.5. greiða út arð.
- 4.5. Auk lögboðinna trygginga kaupi skólinn frá upphafi samnings aðrar nauðsynlegar skaðabóta- og vátryggingar vegna rekstrarins.
- 4.6. Verksali fær endurgjaldslaus afnot af lausafjarmunum skólans, svo sem skrifstofutækjum, kennslutækjum, hermunum og tengdum búnaði, hugbúnaði, vélum og áhöldum, bókasafni og skráum um t.d. nemendur og námsframvindu. Skólanum ber að varðveita, viðhalda og endurnýja lausafjarmuni. Verksali fær einnig endurgjaldslaus afnot af munum og gögnum sem í skólanum eru og greina frá sögu skólans og forvera hans og fjalla um starfsmenn, nám, nemendur o.s.frv. Verksala er skylt að varðveita þessi gögn á öruggan hátt. Skólanum er með öllu óheimilt að veðsetja, leigja eða selja lausafjarmuni, aðra muni og gögn sem hann fær afnot af frá ráðuneytinu með samningi þessum.

## 5. Framlög ríkisins og fjárhagsleg samskipti

- 5.1. Rekstrarframlag ríkisins til skólans á grundvelli samnings þessa er ákveðið í fjárlögum hvers árs sbr. 43. gr. framhaldsskólalaga og 3. mgr. 21. gr. laga um fjárreiður ríkisins. Fjárhagsleg skuldbinding ríkisins verður aldrei hærri en fjárveiting í fjárlögum hvers árs á fjárlagalið skólans.
- 5.2. Fjárhæðir í samningnum eru bæði með fyrirvara um ákvörðun Alþingis um fjárveitingu í fjárlögum og um að stjórnvöld kunna að ákveða breytingar á fjárhæðum við undirbúning fjárlaga vegna aðstæðna í ríkisfjármálum á hverjum tíma. Þannig er þeim heimilt að gera kröfu um hagræðingu við rekstur verkefna sem samningurinn fjallar um á sama hátt og þau gera til ríkisstofnana og annarra sem hafa með höndum sambærilega starfsemi.
- 5.3. Framlag ríkisins samkvæmt samningi þessum tekur breytingum vegna almennrar launa- og verðlagsþróunar eins og hjá sambærilegum framhaldsskólum í fjárlögum hvers árs.
- 5.4. Tillögur ráðuneytisins við undirbúning fjárlaga um árlegt rekstrarframlag til samningsins verða, eins og gagnvart opinberum framhaldsskólum, byggðar á grundvelli reiknireglna sem ráðherra setur með reglum skv. 2. mgr. 43. gr. framhaldsskólalaga.
- 5.5. Þar til reiknireglur liggja fyrir munu sömu reiknireglur og viðmiðanir verða notaðar við tillögugerð vegna samnings þessa og vegna sambærilegra framhaldsskóla ríkisins. Viðmiðanir við upphaf samningsins:
- 5.5.1. Ársnemendafjöldi á grundvelli próftöku í mismunandi námi (áföngum). Miðað verður að hámarki við 1850 ársnemendur en að lágmarki við 1806 ársnemendur enda gefi rökstudd nemendaspá tilefni til að ætla að nemendafjöldi verði á þessu bili.
  - 5.5.2. Framlag sem miðast við laun skólameistara í sambærilegum framhaldsskóla ríkisins.
  - 5.5.3. Framlag til leigu vegna húsnæðis sem skólinn notar og er í umsjá Fasteigna ríkisins. Skólinn fær afnot af Sjómannaskólahúsinu við Háteigsveg, húsnæði



Iðnskólans við Skólavörðuholt og Vörðuskóla. Framlag til leigu húsnæðis að Skeljanesi í Reykjavík, sbr. samning skólans við framkvæmda- og eignasvið Reykjavíkurborgar dags. 20.04.2012.

- 5.5.4. Árlegt framlag vegna samningsbundinna greiðslna til reksturs herma og tengds búnaðar samkvæmt samningi IS 09001 við Kongsberg dags. 10.06.2009 og samningi sem gerður verður þegar núverandi samningur rennur út.
- 5.5.5. Framlag vegna kjarnaskólahlutverks er 2 m.kr. á hvora kjarnagrein.
- 5.5.6. Framlag vegna kennslu á fámennum námsbrautum skal mæta kostnaði við starfsrækslu brautanna sem er umfram það sem reiknilíkan framhaldsskólanna ætlar til þess. Framlagið verður þó aldrei hærra en 6 m.kr. á verðlagi ársins 2013.
- 5.5.7. Framlag vegna sérhæfðra námsúrreða til handa sex einhverfum einstaklingum, sbr. viðauka við fyrri þjónustusamning, undirritaðan 19.06.2012. Framlagið er 61 m.kr. á árinu 2013 og er sú upphæð greidd út tvisvar á árinu, 1. febrúar eru greiddar 30,5 m.kr. og 1. október 2013 eru greiddar 30,5 m.kr. Þessir nemendur teljast ekki til ársnemenda skólans á fjárlögum. Skólaárið 2014-2015 fækkar þessum einstaklingum í fjóra og út samningstímabils þjónustusamnings þessa og lækkar fjárframlag til þjónustu við nemendurna í samræmi við það.
- 5.6. Skólinn skilar, óumbeðinn, ráðuneytinu upplýsingum vegna undirbúnings fjárlagatillagna með sama hætti og opinberir framhaldsskólar. Ráðuneytið kynnir skólanum tillögur sínar og afgreiðslu á þeim með sama hætti og það gerir gagnvart öðrum framhaldsskólum.
- 5.7. Kennarar skólans geta með sama hætti og kennarar annarra framhaldsskóla sótt um launað námsorlof sem fjármagnað er af sérstökum fjárlagalið ráðuneytisins.
- 5.8. Skólinn getur með sama hætti og aðrir framhaldsskólar sótt um fjárveitingar úr sjóðum á vegum ráðuneytisins sem ætlað er að koma á móts við sérgreindan kostnað við þróun og rekstur framhaldsskóla.
- 5.9. Skólinn skilar, óumbeðinn, ráðuneytinu ársáætlun (fjárhagsáætlun) fyrir fjárlagaárið sem er framundan með sambærilegum hætti og opinberir framhaldsskólar gera samkvæmt 7. og 8. gr. reglugerðar um framkvæmd fjárlaga. Jafnframt leggur hann þá fram bráðabirgðauppgjör fjárhagsbókhalds ársins á undan áætlunarárinu.
- 5.10. Ráðuneytið greiðir skólanum framlag í fjárlögum í tólf jöfnum hlutum fyrsta dag hvers mánaðar.
- 5.11. Skólinn skilar ráðuneytinu, óumbeðinn:
  - 5.11.1. Óendurskoðuðu hálfársuppgjöri fjárhagsbókhalds fyrir lok ágúst mánaðar ár hvert eða sambærilegum upplýsingum um fjárhagsstöðu skólans.
  - 5.11.2. Fyrir lok maímánaðar endurskoðuðum ársreikningi ársins á undan sem er áritaður af löggiltum endurskoðanda. Endurskoðandi skal kanna ársnemendatölur og annað sem snýr sérstaklega að framkvæmd þess samnings. Ársreikningurinn skal einnig sendur Fjársýslu ríkisins og Ríkisendurskoðun samkvæmt 20. gr. laga um fjárreiður ríkisins.
- 5.12. Að fjárlagaárinu liðnu er rekstrarframlag gert upp í samræmi við almennar reglur um uppgjör fjárveitinga sem ráðuneytið setur skv. 2. mgr. 43. gr. framhaldsskólalaga.
  - 5.12.1. Þar til almennar reglur hafa verið settar, verður við uppgjör miðað við meðalframlag á ársnemenda eins og það var áætlað í fjárlögum viðkomandi árs að frádregnu framlagi vegna húsnæðis. Skólinn skal láta ráðuneytinu í té upplýsingar um próftöku og annað sem uppgjör





verður byggt á. Skal þetta gert svo fljótt sem verða má eftir einkunnaafhendingu og getur

ráðuneytið ákveðið skiladaga.

5.12.2. Leiði uppgjör í ljós að skólanum hafi verið ofgreitt framlag skal hann endurgreiða


umframframlagið innan tveggja mánaða frá uppgjöri, en þó eigi síðar en í marsmánuði ár hvert. Ráðuneytinu er heimilt að draga ofgreitt framlag frá fjárveitingu á uppgjörsárinu. Skólinn á ekki rétt á hærra framlagi en ákveðið er til hans í fjárlögum, þótt raunfjöldi ársnemenda sé umfram forsendur fjárveitinga til hans, nema um það hafi verið gert sérstakt skriflegt samkomulag í tengslum við innritun nemenda.

## 6. Bókhald og fjárreiður

- 6.1. Halda skal fjárreiðum og reikningshaldi vegna samnings þessa aðgreindu frá öðrum fjárreiðum, bókhaldi og eignum skólans.
- 6.2. Stundi skólinn annan rekstur en þann sem fellur undir samning þennan fylgir hann leiðbeiningum fjármálaráðuneytisins um fjárhagslega aðgreiningu í rekstri ríkisstofnana, kveði lög, reglur eða ákvarðanir samkeppnisyfirvalda ekki á um annað.
- 6.3. Að því leyti sem skólinn fæst við önnur verkefni en felast í framkvæmd þjónustusamnings þessa skal gera grein fyrir fjárreiðum þeirra í ársreikningi skólans.
- 6.4. Eigi skólinn í viðskiptum við lögaðila sem skólinn á eignarhlut í eða er í eigu eigenda skólans, stjórnenda hans, eða annarra fjárhagslega tengdra aðila, skulu þau fara fram á viðskiptalegum forsendum og gerð grein fyrir þeim í ársreikningi skólans. Jafnframt afhendi skólinn ráðuneytinu ársreikning hlutaðeigandi lögaðila sem skólinn er eigandi að.

## 7. Almenn upplýsingagjöf, samskipti og eftirlit

- 7.1. Ráðuneytið hefur eftirlit með framkvæmd samningsins.
- 7.2. Skólameistari kemur fram fyrir hönd skólans og hefur fullt umboð til að taka allar ákvarðanir vegna þess rekstrar sem felst í umsömdu verkefni.
- 7.3. Skólinn á sama rétt á faglegum leiðbeiningum og ráðgjöf frá ráðuneytinu og aðrir framhaldsskólar.
- 7.4. Skólameistari skólans situr fundi sem ráðuneytið heldur með skólameisturum framhaldsskóla sameiginlega um málefni skólastigsins.
- 7.5. Fulltrúar ráðuneytisins boða fulltrúa skólans að lágmarki á einn formlegan fund á ári um samninginn.
- 7.6. Fyrir lok febrúar ár hvert skal skólinn skila ráðuneytinu stuttri ársskýrslu skv. 7. gr. reglugerðar um framkvæmd fjárlaga. Í henni skal greina frá framkvæmd samnings þessa.
- 7.7. Skólinn skilar ráðuneytinu upplýsingum sem það kallar eftir vegna opinberrar upplýsingagjafar.
- 7.8. Skólinn veitir Hagstofu Íslands sundurliðaðar upplýsingar úr nemendabókhaldi og öðrum skráum vegna hagtalna og veitir Hagstofu Íslands og ráðuneytinu upplýsingar sem UNESCO, OECD, EUROSTAT og aðrir sambærilegir aðilar fara fram á.
- 7.9. Skólinn afhendir ráðuneytinu gögn og veitir því upplýsingar sem það kallar eftir vegna eftirlits með rekstri hans og fjármálum og ytri úttektum. Ráðuneytið hefur heimild til að gera sjálf eða fela öðrum að gera athuganir og úttektir á öllum eða einstaka þáttum í starfsemi skólans, svo sem fjármálum, stjórnsýslu og gæðum náms og kennslu. Í því sambandi hefur það óheftan aðgang að öllum gögnum hjá skólanum





sem máli skipta, þar á meðal fundargerðum, skráum, fylgiskjölum, skýrslum, bókum og bréfum. Upplýsingagjöf ráðuneytisins lýtur upplýsingalögum nr. 50/1996.

- 7.10. Um mat og eftirlit með gæðum starfs í skólanum fer samkvæmt VII. kafla framhaldsskólalaga.
- 7.11. Samning þennan, viðurkenningarskjöl skólans, skólasamning, ársreikning skólans, ársskýrslu og úttektarskýrslur skal birta á vef skólans jafnóðum og þessi gögn liggja fyrir. Ráðuneytinu er heimilt að birta gögnin á vef sínum.

## 8. Vanefndir og meðferð ágreinings

- 8.1. Skólanum ber að tilkynna ráðuneytinu skriflega ef vafi leikur á um að hann geti uppfyllt forsendur samningsins sbr. 1. gr. eða aðrar þær skyldur sem samningur þessi kveður á um. Jafnframt skal skólinn senda ráðuneytinu upplýsingar um til hvaða úrræða hann hyggst grípa.
- 8.2. Komi í ljós að annar hvor samningsaðila efni ekki skuldbindingar sínar samkvæmt samningnum er hinum aðilanum heimilt að krefjast úrbóta og setja hæfilega tímafresti. Skal það gert skriflega.
- 8.3. Ráðuneytinu er heimilt að draga úr eða stöðva greiðslur til skólans bæti hann ekki úr vanefndum innan tímafrests sbr. grein 8.2. Ráðuneytið skal þó fyrst gefa stuttan lokafrest til úrbóta.
- 8.4. Samningsaðilar munu leitast við að jafna ágreining, ef einhver er, sín á milli.
- 8.5. Dómsmál sem rísa kann út af samningi þessum skal rekið fyrir Héraðsdómi Reykjavíkur.

## 9. Gildistími og lok samnings

- 9.1. Samningurinn gildir frá 1. apríl 2013 til 31. maí 2018. Hann er endurnýjun á þjónustusamningi með gildistíma 1. júní 2008 til 31. maí 2013 og viðauka við þann samning dags. 19. júní 2012.
- 9.2. Hvor aðili um sig getur óskað eftir því á gildistímanum að einstök ákvæði samnings þessa eða samningurinn í heild verði tekin til endurskoðunar, enda séu færð fyrir því efnisleg rök. Endurskoðun skal þá hefjast svo fljótt sem verða má.
- 9.3. Óski annar hvor aðila eftir að segja samningnum upp skal það gert skriflega í síðsta lagi fyrir lok desember miðað við að samningur gildi til loka yfirstandandi skólaárs.
- 9.4. Skólanum ber að tilkynna ráðuneytinu án dráttar ef til breytinga kemur á eignarhaldi skólans og er ráðuneytinu þá heimilt að segja upp samningnum með þriggja mánaða fyrirvara. Á sama hátt skal tilkynna ráðuneytinu um breytingar á yfirstjórn skólans.
- 9.5. Segi skólinn upp samningnum gildir hann þó áfram um þá nemendur sem eru í skólanum þegar uppsögn berst þar til þeir gætu hafa lokið námi miðað við eðlilegan námshraða, enda semjast ekki um annað við ráðuneytið.
- 9.6. Afturkalli ráðherra viðurkenningu skólans sbr. heimild í 5. mgr. 12. gr. laga um framhaldsskóla vegna þess að skólinn uppfyllir ekki lengur skilyrði hennar eða segi ráðuneytið upp samningnum vegna alvarlegra vanefnda skólans á honum og ágreinings sem aðilum samningsins tekst ekki að leysa úr, getur það leitt til fyrirvaralausrar riftunar samningsins. Ráðuneytið getur þá tekið yfir rekstur skólans eða flutt verkefnið sem samningur þessi fjallar um ásamt fjárveitingum þess til annars skóla enda sé hagsmunum nemenda best borgið á þann hátt að mati ráðuneytisins. Húsnæði, búnaður, kerfi, skrár og skjöl skólans fylgja skólanum.
- 9.7. Samningsaðilar ákveða sameiginlega, innan hálfes árs frá lokum gildistíma samningsins, hvort stefna skuli að endurnýjun hans og hefja í framhaldinu viðræður um það. Liggi á hinn bóginn ljóst fyrir af hálfu annars hvors samningsaðila að vilji sé ekki fyrir hendi til endurnýjunar samnings skal sú afstaða viðkomandi samningsaðila




tilkynnt gagnaðila í samræmi við ákvæði greinar 9.3. Miðað er við að eigi síðar en hálfu ári áður en samningur rennur út hafi ráðuneytið lokið sérstakri úttekt á framkvæmd samningsins og metið forsendur fyrir áframhaldandi samningi. Á grundvelli þeirrar úttektar er tekin ákvörðun um framhald rekstrarverkefnis, sbr. 17. gr. reglugerðar um samninga um rekstrarverkefni sem ráðuneyti og ríkisstofnanir gera til lengri tíma en eins árs.


- 9.8. Af samningi þessum eru gerð þrjú eintök. Hvor samningsaðili heldur sínu eintaki og fjármála- og efnahagsráðuneytið einu.


Reykjavík 08/3 2013  
Staður og dagsetning

  
skólameistari

  
mennta- og menningarmálaráðherra

  
skólameistari

  
fjármála- og efnahagsráðherra  
Samningur staðfestur  
skv. 1. m.gr. 30. gr. fjárreiðulaga nr. 88/1997

  
stjórnarformaður